

## ***Màiri***

Gun sgrìobh mi a' Ghàidhlig bhios bàidheil is fallain  
Mu bhòidhche na cailin as mais' ann an snuadh —  
Chan fhiosrach leam aon té san t-saoghal air thalamh  
A dhùisgeadh fear ealain cho ealamh gu duan.

Taobh a' Chaolais rinn d' àrach gu tràth 'na do leanabh,  
Thug oiteag na mara dhut fallaineachd bhuan;  
Chuireadh gàirich nan tonn thu gu trom 'na do chadal  
'S do dhùsgadh sa mhadainn cho fallain gun ghruaim.

Tha eachdraidh mun chaolas a dh'fhaodainn dhuibh aithris  
Mun t-saoghal chaidh seachad is gàbhaidhean cuain  
Nuair bhiodh Ruairidh mac Nìll a' cur still á cuan Bharraigh  
'S a bhirlinn a' gearradh chì rean geala nan stuadh.

Ach tillidh mi 'n-dràst' a chur fàilt' air a' chailin,  
Na gorm shùilean meallaidh 's na mala gun ghruaim,  
Na bilean as blàitheadh a tharraing a-steach anail  
Bhon tig còmhradh is caithream a tha taitneach do m' chluais.  
Troigh chòmhnard air ùrlar gu sunndach le faram,  
Do chalpannan geala chuireadh sradag 'nam bhuidh;  
Nas àille na flùr tha ùr-dhreach na h-ainnir,  
'S tha caomh-ròs na madainn a' lasadh 'na gruaidh.

Tha h-ìomhaigh cho caoin-gheal ri faoileag na mara  
A th' air faondrachd gach latha fo chathadh nan stuadh,  
Mar ghrian dol don iar 's i triall ás ar sealladh  
Sa chuan siar dol ga falach air ais air a cuairt.

Mo bheannachd gad ionnsaigh 's falbh thugad dùbailt'  
Gu dùthaich nan dùbhghall a-null thar a' chuain  
Bho dhùthaich na Gàidhlig far an òg fhuair thu d' àrach —  
Far 'm bu tric 'na cheòl tàlaidh dhut gàirich a' chuain.